



9. juli 2019

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

### **Naalakkersuisunut apeqquq:**

- 1. Sermitsiami 28. Juni 2019 issuarneqarpoq Kalaallit Airports ilaatigut imatut:**  
“[Ilulissani nutaamik mittarfiliornissap] Akisunerusinnaanera naatsorsuutigineqarsinnaammat ilumoorpoq. Qularnartoqarnerpaatinneqartoq tassaavoq Ilulissani nuna qeriuannartoq qanoq annertutigisoq assaanneqassanersoq.”

Taassama saniatigut oqaatigineqarpoq qillerinerit aamma seismiskimik sajuppillatsitsilluni misissuinerit tamakkiisuunnerat tamatumunnga tunuliaqutaasoq.

Inatsisartut 15. November 2018 pingajussaaneerlugu suliarisaanni imm. 21: “Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit il.il.” tamannalu sioqqullugu Inatsisartut kiisalu avataaneersut suliamut attuumassuteqartut akornanni ilisimatitseqatigiinnerit pineranni saqqummiunneqartarsimangilaq Naalakkersuisut aamma/imaluunniit Kalaallit Airports A/S-ip Ilulissani mittarfiliornissamut atatillugu eqqumaffigigaat qularnartoqarnerpaatinneqartut tikkuarneqartup mittarfiit sanaartorneqarnissaasa aningaasalersorneqarnerannut, pingaartumillu Ilulissani mittarfiliornissamut, ajornartorsiortitsilersinnaasoq nalornisoortitsisinnaasorluunniit.

- Naalakkersuisut uppersarsinnaavaat Inatsisartut 15. November 2018 sioqqullugu ilisimatinneqarsimangitsut Ilulissani mittarfiliornissamut tunngatillugu ajornartorsiutaalersinnaasut qulaani taaneqartut pillugit?

- 2. Naalakkersuisut uppersarsinnaavaat ulloq 15. November 2018 imm. 21-ip Inatsisartuni pingajussaaneerqarneranni tunngavissat pisariaqartut tamaasa tunngavigalugit Inatsisartut aalajangiisimasut?**
- 3. Naalakkersuisut ulloq suna ilisimatinneqarpat pingaartumik Ilulissani mittarfissaq pillugu qularnartoqarnerpaatinneqartoq tassaasoq nuna qeriuannartoq qanoq annertutigisoq assaanneqassanersoq?**
- 4. Ilisimasassaq taanna Naalakkersuisut tapersersortaannut qanga apuunneqarpa?**

## **5. Nalornineq sivitsussagaluarpat Ilulissani mittarfissap piareernissaanut piffissaliussamut tamanna qanoq sunniuteqassava?**

(Inatsisartunut ilaasortaq Sofia Geisler, Inuit Ataqatigiit)

### **Tunngavilersuut:**

Inuit Ataqatigiinniit isertunngisaannarsimavarput mittarfiit akikinnerusumik angalanissamut, pisariinnerusumillu angalanissamut innutaasunut periarfiissut inuiaqatigiillu aningaasaqarnerannut iluaqutaasut pilersinneqarnissaat tapersensoratsigu. Pingaartumik aamma Avannaa eqqarsaatigalugu, ilisimalluinnaratsigu tamaani ilaasunik angallassineq attanneqarsinnaasoq pisariaqartinneqarmat, tamaani nunaqartut eqqarsaatigalugit, aammali inuussutissarsiornikkut, taamalu takornariaqarnikkut, aaqqiinissaq pisariaqartinneqavimmat.

Inuit Ataqatigiinnulli pingaaruteqartoq tassaavoq mittarfiliortiterneq inuiaqatigiit aningaasaqarnerata attassinnaasaanik pissasoq, aammalu kittaartumik sanaartorneqassasut taamaasilluni inuiaqatigiit aningaasaqarnerannik innarliinnginnissaq pingaartikkatsigu. Isuma tanna allanngortinneqanngilaq, akerlianilli sakkortusiartuinnartumik pingaaruteqarluni, tamatumunngalu patsisaaqataapput mittarfiliortiternissamut atatillugu aningaasalersuinissamut nalornissutaasinnaasut ikittunngitsut piffissap ingerlanerani tusartinneqartartut.

Kissaatigaara apeqqutima ullut suliffiusut 10-it iluanni akineqarnissaat.